

«Rinforzar il sport da biatlon»

Uniun grischuna da skis

DA GION NUTEGN STGIER / ANR

■ **Per l'emprima giada en sia istorgia ha l'Uniun grischuna da skis engaschè in trenader da biatlon. Manfred Geyer, l'anteriur biatlet internaziunal, vegn a s'occupar cun la generaziun giuvna da biatlon. Lieu da lavur è per el cunzunt l'Arena da biatlon a Lantsch.** Il sport da biatlon ha ils davos onns er fatg en Svizra in grond svilup e cunzunt er in pulit progress. Internaziunal appartegna il biatlon pli ditg gia tar in dals sports populars ed en spezial en Germania ed en la Scandinavia tutga il biatlon tar ils sports da la classa superiura. Cun l'Arena da biatlon a Lantsch dispona uss er il Grischun e cunzunt er Swiss Ski in lieu da trenadi ed ina arena optimala per cursas nazionalas ed internaziunalas da biatlon. En noss chantun avain nus er radund diesch giuvens che sa participeschan a las diversas cursas da biatlon per juniors ed ina persona ch'è s'engaschada ferm ils davos onns per la promoziun dal biatlon en il Grischun è Ursin Fravi da Lantsch. El è er in dals iniziants da l'arena da biatlon nua ch'ils biatlets giuvens ch'appartegnan al Center da trenadi Grischun cen-

tral han lur lieu da trenadi. Ussa vegnan els trenads professionalmain e quai da Manfred Geyer. Grazia al sustegn da la firma Leonteq, ina interpesa da finanzas, èsi stà pussaivel d'engaschar in trenader professional be per ils biatlets giuvens da noss chantun. Sustegni vegn quel project dentant er dal Center da trenadi Grischun central, da l'Uniun grischuna da skis e lura cunzunt er dal Gimnasi da sport Tavau.

In um cun ina gronda experientscha

«Nus essan ventiraivels da pudair presententar in trenader da format internaziunal», ha ditg Gaudenz Bavier, il president da l'Uniun grischuna da skis, ier a Lantsch. Per quel post da trenader avain nus gi quatter interessents e cun Manfred Geyer engaschè in um cun ina gronda experientscha. In dals intents che nus avain engaschè in trenader professional è er che nus lain rinforzar il sport da biatlon en noss chantun, ha ditg Gaudenz Bavier. Manfred Geyer è uriund da la Germania, ha gudagnà il 1976 tar ils gieus olimpics d'enviern ad Innsbruck ina medaglia da bronz cun l'equipa da biatlon tudestga. Passa 25 onns è el stà tre-

nader da las biatletas dal Club da skis Oberhof (Kati Wilhelm, Katrin Apel, Andrea Henkel) e dal 2004 fin il 2010

trenader da biatlon tar Swiss Ski ed er sponsabel per il grond svilup da quel sport en Svizra. El ha ditg che l'Arena da

biatlon Lantsch saja in lieu ideal da trenadi ed el haja singulas finamiras e cunmenzia cun plaschair sia nova lavur.



Il sponsor, il nov trenader da biatlon ed il president da l'Uniun grischuna da skis: Michael Hartweg, Manfred Geyer e Gaudenz Bavier (da san.).